


00 AUG 2010



ԵՐԿԱՄՍԵԱՅ ՀԱՆԴԷՍ
ՄՇԱԿՈՅԹԻ ԵՒ
ՊԱՏՄՈՒԹԵԱՆ

Խմբագիր՝ Ս. ՎՐԱՅՆՅԱՆ

Դ ՏԱՐԻ, ԹԻՒ 5

1936

ՆՈՅԵՄԲԵՐ - ԴԵԿՏԵՄԲԵՐ

ՅՈՎՀԱՆՆԷՍ ԶԱԻՐԵԱՆ

4947

ԳԱՐԻԻԷԼ ՍՈՒՆԴՈՒԿԵԱՆ

(ԿԵԱՆՔՆ ՈՒ ԳՈՐԾԸ)

I

ԸՆԴՀԱՆՈՒՐ ՎԻՃԱԿ

Գ. Սունդուկեանի կատարած դերը յստակ կերպով ըմբռնելու համար անհրաժեշտ է գէթ երկու խօսքով կանգ առնել այն վիճակի վրա, որ ներկայացնում էր հայ թատրոնը Սունդուկեանից առաջ: Տեղի սղութեան պատճառով սկսեցք, թէկուզ, հէնց Սունդուկեանին նախորդող ժամանակներից, այսինքն՝ անցեալ դարի 50-ական թւականներից, երբ թէ՛ Պոլսի եւ թէ՛ Կովկասի հայութեան մէջ զգացւեց ազգային թատրոնի պահանջը: Հայկական երկու հատուածներն էլ թատերական գործը սկսեցին փոխառութեամբ օտարներից: Արեւմտահայերն իրենց սնունդը ստանում էին ֆրանսական գրականութիւնից, արեւելահայերը՝ ռուսականից: Թարգմանում էին զաւեշտներ, կոմեդիաներ, իսկ Պոլսում նաեւ օպերէտներ: Այդ բոլորը կատարւում էր անխնամ ու հապճեպով եւ, սովորաբար, հրատարակութեան չէր տրւում: Կովկասի հայ բեմին ամենից շատ նիւթ էին մատակարարում Փուլիինեանն ու Տէր - Գրիգորեանը, որոնք այնքան մեծ վարժութիւն էին ձեռք բերել, որ մէկ - երկու գիշերւոյ մէջ մի ամբողջ թատերախաղ էին պատրաստում:

Կովկասում, հայ թատրոնին կից հանդիսանում էր եւ վրացական թատրոնը:

686



511-2001

րոնը, որ նոյն իսկ դեռ 1850 թ. պետական նպաստ էր ստանում: Վըրաց թատրոնի գլուխը կանգնած էր յայտնի գրող Ելիս. Գէորգի Էրեսդովը, որի մերձաւոր աշխատակիցն էր հայ Զուրար Անտոնովը, հեղինակ բազմաթիւ թատերախաղերի, որոնք վայելում էին ժողովրդականութիւն նոյն իսկ համաշխարհային պատերազմի նախօրեակին: Սակայն, հակառակ այդքան բարեյաջող պայմանների, վրաց թատրոնը վերջ գտաւ 1856 թ.-ին:

Կովկասեան թուրքերն այդ ժամանակ դեռ թատրոն չունէին, թէև Միրզա - Յաթհ - Ալի - Ախունդ - Չադէն գրել էր 7 թատերախաղ ազրբէջանեան թուրքերի լեզուով, որոնց մէջ կային եւ խիստ յաջող գործեր: Այդ թատերախաղերը 1852-ին հրատարակեցին ռուսերէն թարգմանութեամբ, իսկ բնագիրը լոյս տեսաւ 1857-ին: Դրանք թարգմանած են եւ պարսկերէն եւ երկար ժամանակ սիրւած էին Պարսկաստանում: Իսկ Կովկասում մինչև 90-ական թւականները ոչ մի անգամ չեն ներկայացել:

Այս էր թատրոնի ընդհանուր կացութիւնը Կովկասում, երբ, իրրեւ թատերագիր, երեւան եկաւ Գ. Սունդուկեանը:

II


ՄԱՐԴԸ

Գարրիէլ Սունդուկեանը ծնւել էր 1825 թ. յունիս 29-ին, Թիֆլիսում: Նրա հայրը, Անչիս - Խատիս եկեղեցու ծխական Մկրտում Սունդուկեանը, բնիկ Թիֆլիսցի էր, Թիֆլիսի մոկալակներէց *), եւ պատկանում էր արտասահմանի - Եւրոպայի - հետ առեւտուր անողների դասին:

Մկրտումը վախճանեց, երբ Գարրիէլը դեռ 6 տարեկան էր: Վերջինիս, ինչպէս եւ կրտսեր եղբօր ու քրոջ խնամքն ու դաստիարակութիւնը ամբողջովին անցաւ մօր, որ ծաւում էր Ռոտինեանց տոհմից եւ մեծ մտքի ու լայն սրտի տէր կլին էր: Նա կարողացաւ իր գաւազին տալ այն ժամանակների համար բացառիկ կրթութիւն եւ մինչև մահ էլ պահեց իր ազդեցութիւնը նրա վրա:

Մի դէպք մեծապէս օգնեց նրան: Ամուսնու մահից յետոյ, նրանց տան վերին յարկում բնակեց Փարիզի Արեւելեան Կենդանի Լեզու-

*) Մոկալակի էին կոչուում Թիֆլիսի հարուստ վաճառականները, որոնք սովորաբար գրաւում էին մեծաթանակ առեսրատ: Առանձին դաս էր վրաստանում՝ դասային յատուկ արտօնութիւններով: Մոկալակիները համարուում էին պատուար քաղաքացիներ:



ԳԱԲՐԵԼ ԱՌԵՆՎՈՒԳԵԱՆ

ների վարժարանի ուսուցչապետ ուռհայեցի Յակովբ Շահան Զրպետը իր Փրանսուէի կնոջ հետ: Շահան Զրպետը հրաւիրւած էր Ներսէս Աշտարակեցու կողմից կազմակերպելու Ներսիսեան դպրոցը:

1832 թ. ապրիլ 1-ին Գարրիէլը սկսեց դաս առնել Զրպետ ամուսիններից եւ շարունակեց մինչեւ 1838 թ., երբ օգոստ. 16-ին մեռաւ Շահան Զրպետը, իսկ կինը վերադարձաւ Ֆրանսա: Ամէն օր առաւօտեան ժամը 8-ից մինչեւ երեկոյեան ժամը 6-ը Գարրիէլը մնում էր Զրպետի տանը, ուր, բացի ընդհանուր դարգացումից, ստանում էր նաեւ Զրպետից հին ու նոր հայերէնի, իսկ կնոջից՝ Փրանսերէնի դասեր: Արդիւնքը եղաւ աւելի քան դոհացուցիչ: Գարրիէլը շատ լաւ սովորեց հայերէն լեզուն եւ ազատ խօսում, կարգում ու գրում էր Փրանսերէն: Բացի այդ, Զրպետից սովորեց եւ լատիներէն ու իտալերէն եւ առանձնապէս սիրեց երկրաչափութիւնը: Տարիներ յետոյ, Սունդուկեանը, առանց վարձատրութեան, երկրաչափութիւն դասաւանդեց Ներսիսեան դպրոցում: Քանի որ Զրպետեան ամուսինները ուսներէն չզխտէին, մօր պնդումով Գարրիէլը ուսներէն լեզւի դասեր առաւ նախ հայ - կաթոլիկ Մամուլեանից, յետոյ ուսական Գիմնադիւանի հայերէնի ուսուցիչ Արարտեանից:

Զրպետի մահից յետոյ Գարրիէլը մտաւ Արզանով եղբայրների Ազնւականների գիշերօթիկ վարժարանը, որ կազմակերպւած էր Լադարեան ձեմարանի ձեւով, եւ 1840-ին աւարտեց մրցանակով: Նոյն տարին մտաւ Թիֆլիսի Գիմնադիւան, որ աւարտեց 1841-ին: Իբրեւ յաջող աշակերտ, ստացաւ պետական թոշակ եւ մեկնեց ուսանելու Պետերբուրգի համալսարանում: Մտաւ բանասիրական բաժնի արեւելեան լեզուների մասը եւ յաջողութեամբ աւարտեց 1850-ին

1850 թ. Թիֆլիս վերադառնալուց յետոյ, Սունդուկեանը, իբրեւ թոշակառու, կոչեց պետական ծառայութեան եւ կովկասի փոխարքայի դիւանատանը ստացաւ սեղանապետի օգնականի պաշտօն: Երեք տարի յետոյ, փոխարքայի կարգադրութեամբ փոխադրեց Դերբենտ, նահանգապետի դիւանատան կառավարչի պաշտօնով: Այդ փոխադրութիւնը տեղի ունեցաւ իբրեւ հետեւանք բախումի, որ Սունդուկեանը 1852-ին ունեցաւ փոխարքայի դիւանատան գանձապետ Բելեայեւի հետ: Վերջինս անարգական վերաբերում էր ցոյց տւել դէպի Սունդուկեանը, եւ սա շատ ծանր խօսքերով պատասխանել էր նրան: Բելեայեւը դիւանապետ Շչերբինայի միջոցով պահանջել էր, որ Սունդուկեանը հրապարակով ներողութիւն խնդրէ իր ասածների համար, բայց մերժում էր ստացել: Շչերբինան բաւականացել էր միայն Սունդուկեանին բանտարկելով դիւանատան մէջ, բայց Բելեայեւը այդ-

քանով չէր գոհացել եւ յաջողել էր, 7 ամիս յետոյ, Սունդուկեանին Դերբենդ փոխադրել տալ:

Դերբենդում Սունդուկեանը մնաց ամբողջ հինգ տարի եւ բազմաթիւ անգամներ խնդրեց փոխարքայ իշխ. Վորոնցովին եւ սրա յաջորդ իշխ. Բարխատինսկիին, որ իրեն իրաւունք տրւի վերադառնալ Թիֆլիս: Խնդրում էր եւ մայրը, բայց միշտ ապարդիւն: Միայն 1858 թ. նրան յաջողեց տեղափոխել Թիֆլիս, այս անգամ ձանապարհների Հաղորդակցութեանց Շրջանային Վարչութիւնը, ուր պաշտօնավարեց 50 տարի, մինչեւ 1907 թ. փետրւար, երբ թողեց պաշտօնը տարեկան 2500 ռուբլու կենսաթոշակով և գաղտնի խորհրդականի աստիճանով: Հրաժարականի պաշտօնաթղթում կառավարութիւնը առանձնապէս գնահատում էր նրա անկաշառ եւ ազնիւ նկարագիրն ու օրինակելի պաշտօնավարութիւնը:

1863 թ. Սունդուկեանը ամուսնացաւ Սոֆիա Միրիմանեանի հետ, որի հետ գրեթէ 50 տարի ապրեց սիրով ու համերաշխութեամբ: Ամուսնութիւնից ունեցաւ հինգ զաւակ՝ երկու մանչ, երեք աղջիկ:

Իր ամբողջ կեանքը Սունդուկեանը անցկացրեց Թիֆլիսում. միայն չորս տարի ապրեց Պետերբուրգում, ուսանելիս, հինգ տարի Դերբենդում եւ մի ամիս էլ Փարիզում: Թիֆլիսի հետ նա կապած էր բացառիկ սիրով եւ քաղաքն ու բնակչութիւնը ճանաչում ու սիրում էր ջերմօրէն: Նա հաւասար կատարելութեամբ տիրում էր հայերէն ու վրացերէն լեզուներին, լաւ գիտէր թուրքերէն ու պարսկերէն եւ հիմնովին տեղեակ էր արաբերէն լեզւի տարբերքին: Շատ լաւ գիտէր եւ ռուսերէն ու ֆրանսերէն:

Սունդուկեանը բարձրահասակ, բարեկազմ, պատկառելի արտաքինով, գեղեցիկ մարդ էր: Արտաքինով միշտ մաքուր ու մայելուչ, հազնում էր անթերի ձերմակ սպիտակեղէն եւ ամառ – ձմեռ կրում էր բաց – գորշ մորթէ գտակ: Անթերի մաքրութեան տպաւորութիւն էին թողնում եւ նրա տունն ու ընտանիքը: Մարմնաւոր մաքրութիւնը ապացոյց էր եւ նրա ընտանիքի բարոյական մաքրութեան, որի բոլոր անդամները կապած էին իրար հետ սիրոյ եւ մտերմութեան կապերով:

Սունդուկեանը հարուստ մարդ չէր, բայց եւ երբեք կարիքի մէջ չի գտնուել: Նա որոշ ժառանգութիւն էր ստացել իր հօր երբեմնի խոչոր հարստութիւնից եւ ինքն էլ շատ լաւ ռոճիկ էր ստանում: Այդքանը բաւական էր պարզ եւ հիւրասէր կեանքի համար: Նա իրեն պահում էր մեծ արժանապատուութեամբ եւ անկեղծ յարգանք էր առաջ բերում ամենքի մէջ:

Նիւթական ասպնոյութիւնը աղատում էր նրան կախումից հասարակական գործերում: Նա ինչ որ անում էր՝ անում էր առանց վարձատրութեան, յաճախ ինքն էր ծախսում առանց յետ ստանալու ակնկալութեան:

Սէրը դէպի թատրոնական գրականութիւնը Սունդուկեանի մէջ երեւան եկաւ դեռ պատանեկան օրերին: Մի անգամ, դեռ գիմնազիայի աշակերտ եղած ժամանակը, 17 տարեկան հասակում, նրա ձեռքն ընկաւ Շիլլէրի «Սէր եւ Խարդաւանք» թատերգութեան ռուսերէն թարգմանութիւնը: Երեկոյեան նստեց կարդալու եւ, հակառակ մօր պնդումներին, տեղից վեր շէլաւ մինչեւ որ առաւօտեան ժամը 4-ին չվերջացրեց ընթերցումը: Եւ երկար ապրում էր կարդացած դրքի տպաւորութեան տակ: Ըստ երեւոյթին, այդ նոյն դիշերն էլ երեւան եկաւ նրա սէրը դէպի թատրոնը: Պետերբուրգում, ռուսնողական աշխատանքների միջոցին, նա ջանասիրութեամբ յաճախում էր ռուսական եւ Փրանսական ներկայացումները Ալեքսանդրինսկի եւ Փոքր թատրոններում, որոնք երկուսն էլ այն ժամանակ դերասանական փայլուն կազմ ունէին: Միեւնոյն ժամանակ Սունդուկեանը եռանդով ծանօթանում էր համաշխարհային գրականութեան եւ, մանաւանդ, թատերական գլուխ գործոցներին:

III

ԳՈՐԾԸ

Երբ 1858 թ. Սունդուկեանը Դերբենդից եկաւ Թիֆլիս, այնտեղ նա գտաւ հայկական կազմակերպած թատրոնի պէս մի բան: Առաջ էր եկել դերասանների աւելի կամ պակաս չափով մնայուն մի խումբ եւ ժամանակ առ ժամանակ տրւում էին ներկայացումներ: Խաղացանկը բաղկացած էր գլխաւորապէս զաւեշաներից ու թեթեւ կոմեդիաներից, որ ռուսերէնից առնելով յարմարեցնում էին Փուլիներանը եւ Տէր – Գրիգորեանը:

Երբ Սունդուկեանը ծանօթացաւ ու բարեկամացաւ դերասանների ու թատերագիրների հետ, սրանք շատ շուտով տեսան, որ նա լաւ հասկանում է բեմական արւեստը եւ շատ իրազեկ է եւրոպական թատերական գրականութեան: Բանը սկսեց խորհուրդներից, որոնց համար յաճախ գիմում էին Սունդուկեանին, իսկ վերջը բարեկամները սկսեցին ինդրել, որ թատերախաղեր գրէ: Սունդուկեանի առաջին փորձը, 1863-ին, եղաւ «Գիշերւայ սաբբը խէր է» կատակը, որի մէջ արտայայտեց Սունդուկեանի հմտութիւնը բեմական արւեստ-

տում, այլ եւ նրա քաջ ծանօթութիւնը մանր առեւտրական դասի կեն-
ցադին ու Թիֆլիսի բարբառին: Մի գործողութիւնից բաղկացած այդ
կատակը անօրինակ յաջողութիւն դտաւ եւ երկար չէր վերացուած
բեժից:

Սունդուկեանի յօրինած երկրորդ թատերախաղը եղաւ «Խաքա-
բալա»-ն, (1865 թ.), սկզբնապէս երկու գործողութիւնից: Այստեղ
վեր է առնւած ամուսնութեան խնդիրը, որ այն ժամանակները հայ
կեանքի ցաւոտ երեւոյթներէից մէկն էր: Եւրոպական կրթութիւն
ստացած մի իրտասարդ, փողոցում, մի տան դրան առջեւ, պատա-
հում է մի գեղեցիկ կնոջ եւ շատ հաւանում է նրան: Դրանից օգտը-
ւում է այդ տան տէրը, մի հարուստ վաճառական, որ ունէր արտա-
քինով խիստ ազեղ, բայց գեղեցիկ հոգու տէր մի աղջիկ. եւ աշխա-
տում է իր աղջկան ամուսնացնել վերեւ յիշւած երիտասարդի հետ:
Վերջինս պնդում է, որ նշանելուց առաջ տեսնելի հարսնացուի հետ:
Հայրը սարքում է տեսակցութիւն – նշանադրութիւնը: Բայց ինչքան
եւ աշխատում են աղջկան գեղեցկացնել, կեղծիքը երեւան է դալիս
եւ նշանադրութիւնը ջուրն է ընկնում:

Այս նիւթը Սունդուկեանին շատ էր զբաղեցնում եւ նա երկու
անգամ վերամշակեց իր գրւածքը: Երկրորդ վերամշակութեան ժա-
մանակ «Խաքաբալա»-ն դարձաւ երեք գործողութիւնից բաղկացած
եւ վերջնական ձեւն ստացաւ 1879 թ. իրբեւ չորս գործողութեամբ
թատերախաղ: Աստիճանաբար խաղը ազատեց կատակի տարրից եւ
վերածւեց իրական ճշմարտութեամբ յագեցած թատերական երկի:
Պէտք է նկատել, որ հեղինակը աշխատում է գրաւել ընթերցողի եւ
դիտողի համակրանքը դէպի մտաւորականը, որ այդպիսի տարօր-
նակ ձեւով կին է փնտռում իրեն համար, բայց ընթերցողի ու դիտո-
ղի, ինչպէս եւ հեղինակի իրական համակրանքը ամբողջապէս թըշ-
ւառ աղջկայ կողմն է:

Հայ կնոջ կեանքի ծանր վիճակը Սունդուկեանի մշտական մտա-
հոգութեան առանցքն է կազմում: Նա անվախ ու համարձակ կեր-
պով, գրեթէ իր բոլոր երկերում այս կամ այն ձեւով պաշտպան է
դուրս գալիս հայ կնոջ ոտնահարած իրաւունքների, արդարացնում
կամ ելք է փնտռում եւ միշտ համակւած է անկեղծ ու ջերմ կարեկ-
ցութեամբ դէպի հայ կնոջ դառն ճակատագիրը:

«Խաքաբալա»-ին 1866 թ. յաջորդեց «Օսկան Պետրովիչն էն
կիմքում» մէկ արարնոց կատակը, որի մէջ Օսկանը – «Գիշերայ սա-
բրը խէր է» զաւեշտի հերոսը – մահւանից յետոյ, հակառակ իր ա-
կնկալութեան, դժոխք է ընկնում, ուր հանդիպում է իր Թիֆլիսեցի

ծանօթներէց շատերին, որոնց թւում եւ «Սաթարալա»-յի հերոսներին: Եւ ամէն հանդիպման առթիւ Օսկանը սրամիտ նկատողութիւններ է անում:

1869 թ.-ին Սունդուկեանը տւեց մի նոր կատակ՝ «Եւ այլն, կամ նոր Դիոգիւնէս», որի մէջ Թիֆլիսցի առեւտրականները սուր ծաղրի են ենթարկում Փարիզից վերադարձած եւ պատուաւոր ընտանիքում իրեն պահել չգիտցող երիտասարդին: Հեղինակը իր այս գրածքին առանձին կարեւորութիւն չէր տալիս եւ տպեց միայն 1907 թ., երբ պատրաստում էր իր երկերի ժողովածուի հրատարակութիւնը:

1869 թ. վերջերը Սունդուկեանը լոյս ընծայեց իր «Ելի մէկ գոն» վեց արարնոց թատերգութիւնը: Սկզբնապէս այդ երկը կրում էր «Մախլաս» անունը եւ մէկ անգամ ներկայացւեց բարեգործական նըպատակով, բայց հեղինակը մնաց դժգոհ եւ առաւ ու անմիջապէս վերամշակեց: «Ելի մէկ գոն»-ի բովանդակութիւնը հետեւեալն է.— Սարգիս անուենով մի հարուստ վաճառական ունի մի ուսեալ ու դադարեալական որդի, որ սիրահարւած է մի գնդապետի աղջկայ վրա. աղջիկն էլ սիրում է նրան: Թիֆլիսցի միլիոնատէր Բրիլիանտովն էլ ունի մի աղջիկ ու մի տղայ. երկուսն էլ թեթեւամիտ ու պծնասէր: Բրիլիանտովը որոշում է որդուն ամուսնացնել գնդապետի աղջկայ հետ, իսկ աղջկան՝ տալ Սարգսի տղին: Այդ նպատակով համաձայնութեան է գալիս Սարգսի հետ, սա էլ իր հերթին խօսք մէկ է անում գնդապետի կնոջ հետ: Նրանց ծրագիրը իրականանում է. մայրը յաջողում է համոզել աղջկան, որ մերժի Սարգսի որդուն եւ ամուսնանայ միլիոնատէրի որդու հետ: Սկզբնական ձեւի մէջ, ընդհակառակը, խաղը վերջանւմ էր միլիոնատէրի խայտառակութեամբ եւ սիրահար զոյգի ամուսնութեամբ:

1870 թ. Սունդուկեանը հրատարակ է գալիս իր «Պէպո»-յով, որ իրական յեղաշրջում առաջ բերեց հայ թատերական գրականութեան մէջ: «Պէպո»-ն շատ շուտով գրաւեց առաջնակարգ տեղ հայ բեմի վրա և մինչեւ այսօր էլ պահում է այդ տեղը: Հիմա էլ վերածւած է շարժապատկերի եւ շարունակում է գրաւել հասարակութեան ուշադրութիւնը: «Պէպո»-ն մի տեսակ յայտնութիւն եղաւ ամբողջ Կովկասի համար: Նա անցաւ վրաց, թրքական եւ նոյն իսկ ռուսական բեմերը: Սունդուկեանի միւս բոլոր երկերի պէս, «Պէպո»-ն էլ բացառիկ յաջողութիւն գտաւ վրացիների մօտ: Պէտք է ասել, որ «Պէպո»-յի վրաց բեմի վրա ունեցած յաջողութեան պատճառներից մէկն էլ վարպետ թարգմանութիւնն է, որ արել է հեղինակը ինքը:

«Պէպո»-յի մէջ միաժամանակ զարգանում է երկու դրամա. մէկը

Պեպոյի քոյր Կէկէլի ողբերգութիւնն է. Կէկէլը նշանաժ է մի երկ-տասարդ վաճառականի հետ, որին խոստացած է 1000 ուրբի օժիտ: Պեպօն կորցրել է վաճառական Արուսիին Ձիմղիմովի տւած 1000 ուրբ-ը մուրհակը, եւ Ձիմղիմովը մերժում է վճարել դրամը, որի պատ-ճառով նշանածն էլ հրաժարուում է Կէկէլից, որ խորը վշտի մէջ այս-պէս է արտայայտում իր ցաւը. «Ինձ պաչ արաւ ու իմ պաչը տարաւ ուրիշին էրիտ.» (3-րդ գործ., 2-րդ տես.):

Աղջկայ այդ ողբերգութեան կից եւ աւելի ուժգնութեամբ զար-գանում է Պէպոյի հոգեկան տառապանքը. նա ինքն է նշանել քրոջ եւ խոստացել օժիտ տալ. ինքն է կորցրել մուրհակը եւ դրանով անբու-ժելի ցաւ պատճառել քրոջ: Երկրորդ գործողութեան մէջ կայ մի հիա-նալի երկախօսութիւն Պեպոյի եւ Արուսիինի միջեւ, ուր Պեպօն բար-ձրանում է բարոյապէս եւ ողորմելի վաշխառու Արուսիինը մնում է սեւերես: Սունդուկեանի իր իսկ ասելով՝ այդ երկախօսութիւնը յօ-րինելիս, նա վերապրել է այն խիղախ խօսքերը, որ 1853-ին ինքը աս-ել էր փոխարքայի դիւանատան գանձապետին եւ որի պատճառով աքսորել էր Դերբենս:

Իր յանդուգն խօսքերի համար Պեպօն դատապարտուում է բան-տարկութեան, բայց ահա մուրհակը գտնուում է: Առնելով այդ լուրը, Արուսիինը շտապում է Պեպոյի մօտ եւ խոստանում է ազատել բան-տից. նա պատրաստ է նոյն իսկ կրկնակին վճարել, միայն թէ խայտա-ռակութիւնից ազատել: Բայց Պեպօն անողոք է. նա պատասխանում է. «Հաջաթ չէ, կէհամ բիրթը կու նստիմ. Էնդի խօ չիմ մեռնի, մէ օր կու ազատիմ ախար, էլի վաղէն հեռու չէ: Շատի՛ն իս խափի էսէնց, շատի՛ գլխին իս օյին էկի էսէնց, շատի՛ բողազն իս դուս կտրի էսէնց, ու յիս Պեպօն չիմ ըլի, թէ դիփունանց ջիգըրը չիմ հանի: Սաղ աշխարքում էրէսդ մուր կու շինիմ»:

«Պեպօ»-ն Սունդուկեանի միակ երկն է, որ դուրս է գալիս քաղ-քենի շրջանից եւ պատկերացնում է Թիֆլիսի հասարակական նոր խաւի՝ արհեստաւորների եւ շրջուն առեւտրականների կամ կինտօ-ների կենցաղը: Գեղեցիկ ձօնի մէջ, որով գրեւոր է նւիրած է յայտնի դերասան Գէորդ Չմշկեանին, որը համոզել էր տիպեր առնել կինտօ-ներից, Սունդուկեանը «կինտօ» հասկացողութիւնը բնորոշում է «լո-թի եւ պատարնի» *) բառերով:

Թիֆլիսի կինտօները բաժանուում էին երկու կարգի՝ զարաչուխա-

*) «Պաժարնի», որ նշանակում է հրշէջ, մօտաւորապէս նայն իմաստում գարծ է ածուում եւ պոլսահայոց մէջ՝ «թուլութեամբ»:

լու եւ պարզ կինտօներ : Պեպն պատկանում էր դարաչուխալու շարքին՝ մի տեսակ կինտոյական աղնականութիւն, որ պահում էր իրեն մեծ արժանապատուութեամբ, խիստ պատւախնդիր էր եւ տրւած խօսքը պահող : Հագուստով էլ նրանք տարբերւում էին միւս կինտօներից : Հագնում էին սեւ չերկէսկա, մինչդեռ պարզ կինտօները, ինչպէս Կակուլին, հագնում էին սովորական արխալուխ եւ միայն հանդիսաւոր օրերին երեւում էին չերկէսկայով : Պարզ կինտօները շքեղուն մանրավաճառներ էին եւ իրենց ամբողջ սպորանքը կրում էին գլխի վրա, փայտէ ամանով (թարախ) : Կինտօների երկու խումբն էլ յայտնի էր սուր լեզուով եւ ուրախ ու զարթ սպրեյակերպով : *)

Պեպո»-յին յաջորդեց, 1871 թ., «Բանդւած Օջախ»-ը, ուր ողբերգութիւնը ծագում է մի աղջկայ ամուսնութեան խնդրից : Օսէփ անունով ոչ - հարուստ վաճառականի կին՝ Սալոմէն՝ կամենալով իր աղջկան տալ մի երիտասարդ պետական պաշտօնեայի, երկար խնդիրներից յետոյ, համաձայնում է օժիտը հասցնել 7000 ուրբուլ : Օսէփը մեծ դժուարութեամբ կարողանում է յանձն առնել այդ պարտականութիւնը : Այդ մասին լուր է առնում Օսէփի պարտապահանջ վաշխառու Փարսեղը, որ մտածում էր ի՛ր աղջիկը ամուսնացնել նոյն պաշտօնեայի հետ : Անմիջապէս դիմում է դատարան, նշանադրութեան օրը, մուրհակը ձեռքին, ոստիկանների հետ դալիս է Օսէփի տունը եւ հիւրերի ներկայութեամբ դրամն է պահանջում : Փեսացուն իսկոյն փախչում է, հիւրերը բամբասելով հեռանում են եւ «քանդւած օջախը» մնում է մենակ ու թշւառ :

Թատերգութեան բոլոր տիպերը շատ բնական ու կենդանի են, միայն Օսէփը մի քիչ շատախօս է : Դրա փոխարէն՝ Օսէփի հօրաքոյր Սախօն ուղղակի հիանալի է իր ոսկի սրտով ու իմաստուն խօսքերով : Նա այնքա՛ն յիշեցնում է Սունդուկեանի մօրը, որը անսահման ազդեցութիւն է ունեցել որդու վրա : Վեսելովսկիին գրած մի նամակում, Սունդուկեանը ասում է, թէ Օսէփի տիպով նա ներկայացրել է իր ազգականներից մէկին, իսկ Սախօն իր մայրն է :

Վերջապէս, 1878-ին, հայ դերասանական խմբի խնդրանքով, Սունդուկեանը հայացնում է Մոլիէռի « Ժորժ Դանդէն » յայտնի թատերախաղը : Հայերէնում ժորժ Դանդէնը դառնում է Դանդուռ Գէվօ, Անտելիկը՝ Նարնուրիսա, Դէ - Սոտանովիլը՝ Չանգիբաշի եւ այլն : Ինչպէս, առհասարակ, Սունդուկեանի բոլոր գործերը, այս էլ

*) Վրացի բանաստեղծ Գրիշաշվիլին Թիֆլիսին նկրած իր ուսումնասիրութեան մէջ շատ էջեր է ներքել կիսուսներին :

բեմի վրա մեծ յաջողութիւն ունեցաւ, բայց հեղինակը հրապարակութեան չտւեց, այլ սկսեց թարգմանել բուն բնագիրը, որ լոյս տեսաւ միայն 1907-ին: Թարգմանութիւնը կարելի է համարել գլուխ գործոց, եւ Սունդուկեանի տիրապետութիւնը Թիֆլիսի բարբառին՝ սքանչելի:

Այս երկերով վերջանում է Սունդուկեանի ստեղծած իրապաշտ թատերախաղերի շարքը, որ մեծ մղում տւեց հայ թատրոնին եւ հայ սիրող գերասանից ստեղծեց գիտակից թատրոնական գործիչ: Սունդուկեանի այս գործերի ազդեցութեան տակ էր, որ հայ թատրոնական գրականութիւնը ստացաւ իրապաշտ բովանդակութիւն եւ ընթացք:

Ապա Սունդուկեանի ստեղծագործութեան մէջ գայլիս են աւելի փիլիսոփայական բնոյթ կրող երկեր: Վաթսուն տարեկան հասակում, 1890-ին, նա գրում է «Ամուսիններ»-ը: Առաջ նա մերկացնում էր հայ իրականութեան եւ մասնաւորապէս ընտանեկան կեանքի վէրքերը. հիմա արդէն փնտռում է վէրքերը բժշկելու միջոցներ: «Ամուսիններ»-ի մէջ, որ Սունդուկեանի միակ գործն է, գրւած գրական հայերէնով, պետական բարձր պաշտօնեայ Սամսոնեանը ամուսնացած է Մարգարիտ անունով մի գեղեցիկ ու պարկեշտ կնոջ հետ: Ամուսինը, աւելի քան թեթեւամիտ մի մարդ, ամէն քայլափոխին դաւաճանում է կնոջ: Կինը գիտէ այդ եւ նեղում է թէ ամուսնու անառակ վարք ու բարքից եւ թէ ընտանեկան անբովանդակ ու տժգոյն կեանքից: Մի անգամ նա հանդիպում է իր մանկութեան մէկ ընկերոջ՝ սպայ Արամեանին, որին սիրել է մի ժամանակ ու սիրել փոխադարձաբար: Հին սէրը նորից բորբոքւում է նրա մէջ, եւ նա որոշում է թողնել ամուսնուն ու սեփական աշխատանքով ապրել: Ամուսինը մերժում է իրաւունք տալ, որ նա առանձին ապրի, բայց Արամեանը յաջողում է նրանից ստանալ այդ իրաւունքը: Մարգարիտն ու Արամեանը բացատրւում են փոխադարձ սիրոյ մէջ եւ որոշում են սպասել օրինական ամուսնալուծութեան, որ յետոյ ամուսնանան: Այսպիսով, ուրեմն, ելքը գտնւած է. կինը կարող է թողնել իր չսիրած ամուսնուն եւ ազատ ընտրութեամբ նոր կեանք սկսել սիրած մարդու հետ:

Այն ժամանակների եւ ա՛յն շրջանների համար, ուր ապրում էր Սունդուկեանը, սա, ի հարկէ, նոր ուղի էր: Այս գործը, ինչպէս կը տեսնենք քիչ յետոյ, մեծ հոգս ու յուզում պատճառեց Սունդուկեանին, բայց առանձին յաջողութիւն չունեցաւ ո՛չ հայ, ո՛չ վրաց, ո՛չ էլ ռուս բեմերի վրա: Երկու հակադիր ուղղութեան պատկանող թեր-



ԹԻՖԼԻՍԻ ՀԱՅ ԳԵՐԱՍԱՆՆԵՐԻ ԵՒ ԹԱՏԵՐԱՍԵՐՆԵՐԻ ԱՌԱՋԻՆ ԽՈՒՄԲԸ

1.- Արտ. Սուբխան, դերասան, 2.- Յովս. Արովանց, դեր. 3.- Բժ. Միք. Տէր - Գրիգորեանց, քաներագիր, 4.- Գեորգ Աղիբեգեանց, յուշարար, 5.- Պերն Պաշեանց, 6.- Բժ. Ռոմ. Նաղիրեանց, 7.- Պետ. Վարշամեանց, դեր. 8.- Մարկ. Աղաբեգեանց, խմբագիր, 9.- Սահ. Աղիբեգ - Մելիքեանց, դեր. 10.- Գր. Բեժանեանց, դեր. 11.- Միկր. Ամրիկեանց, դեր. 12.- Գր. Եզնիրեանց, ընդհ. վարիչ, 13.- Յովհ. Կուսիկեանց, դեր. 14.- Թով. Չարդեղեանց, դեր. 15.- Պօղ. Բեճեկեան, դեր. 16.- Վաղ. Շահխարունեանց, դեր. 17.- Գարր. Սուհրուբեան, 18.- Կոստ. Տէր - Ստեփանեանց, երգիչ, 19.- Մեհրաբեանց, երգիչ, 20.- Գեորգ Արովեանց, երաժշտապետ, 21.- Բժ. Նիկ. Փուղինեանց, քաներագիր, 22.- Սա. Տէր - Յովհաննիսեանց, դեր. 23.- Յար. Յարութիւնեանց, երգիչ, 24.- Սա. Մա- տինեանց, դեր. 25.- Յովհ. Քարանեանց, գեղարուեստ.:

թերն էլ՝ «Մշակ» ու «Նոր Դար», աննպաստ արտայայտեցին, ի հարկէ, ամէն մէկը իր տեսակէտից :

«Ամուսիններ»-ից յետոյ Սունդուկեանը երկար լռեց: Եւ միայն 1907 թ. հրատարակ եկաւ «Բաղնիսի բողջա» զաւեշտով, ուր երիտասարդ այրի Թալալը, որ մի շարաթ առաջ կորցրել էր ամուսնուն, որի մահը դառնօրէն լացել էր, հեռանում է սկեսուրի տնից, իբր թէ, մօր հետ բաղնիք գնալու եւ յետոյ մօրը տանը գիշերելու համար: «Բաղնիսի բողջա»-ն պատրաստելիս, նա զաղտագողի մէջը դնում է իր բոլոր թանկագին իրերն ու լաւ հագուստները եւ գնում է ծնողների տունը, ուր բաղնիքի փոխարէն նրան սպասում էր նշանադրութիւն մի հարուստ ծերունու հետ, որին Թալալը խելքից հանել էր իր տեսքով, երգերով ու պարերով:

Իր այս գործին Սունդուկեանը կցել էր հետեւեալ ծանօթութիւնը. «Սա իմ «Պեպօ» կատակերգութեան յառաջաբանը, նրա նախերգանքն է, ուր Աղալոյի եւ Թալալի դիմակի տակ մանրամասնօրէն նկարագրուած է, թէ ինչպէս գտան միմեանց եւ ամուսնացան «Պեպօ»-յի Զիմզիմովն ու նրա ընտրած ու սիրած Եփեմիան»:

Հակառակ իր յառաջացած տարիքին, այս զաւեշտում էլ Սունդուկեանը պահել է ոճի ու գործողութեան աշխուժութիւնը: Տիպերն ու կեանքի պատկերները այնպէս կենդանի են ներկայացւած, որ «Բաղնիսի բողջա»-ն ոչինչով յետ չի մնում Սունդուկեանի առաջին չրջանի գործերից:

1907 թ. Սունդուկեանը թողնելով պետական պաշտօնը՝ ձեռնարկում է իր անտիպ գործերի հրատարակութեան եւ արդէն տպւած ու սպառուածների՝ վերհրատարակութեան՝ վերջնական խմբագրութեամբ: Եւ 1907 թ.ից սկսած իր բոլոր հրատարակութիւնների վրա իր անւան կողքին, փակագծի մէջ աւելացնում է «Համմալ» կամ «Նոյն եւ Համմալ», որ իր սկզբնական ծածկանունն էր:

1909 թ. Սունդուկեանը Թիֆլիսում բեմադրում է մի նոր թատերախաղ՝ «Սէր եւ Ազատութիւն», իսկ յաջորդ՝ 1910-ին, իր ծննդեան օրը, յունիս 27-ին, այդ թատերախաղից մէկ օրինակ ընծայում է կընոջ մի յուզիչ մակագրութեամբ: Այդ գրւածքում 40 տարեկան մի մարդ ամուսնանում է 20 տարեկան ամէն տեսակէտից գեղեցիկ մի աղջկայ հետ: Ամուսինը անսահման սիրով սիրում է իր երիտասարդ կնոջ, բայց վերջինս յայտնում է, թէ ինքը շատ է գնահատում ու յարգում, բայց չի սիրում ամուսնուն: Վերջինս զգացւած՝ կնոջ ազատութիւն է տալիս եւ ինքը հեռանում է՝ խոստանալով ձեռք բերել ամուսնայութեան արտօնութիւն: Նիւթը, ինչպէս տեսնում ենք,

նոյնն է ինչ որ «Ամուսիններ»-ի մէջ, միայն այնտեղ ամուսինը անպիտան մէկն է, իսկ այստեղ՝ շատ աղնիւ, զգայուն եւ զոհաբերութեան ընդունակ մի մարդ: ՏՃ տարեկան հեղինակի այս գործը, հակառակ նիւթի հնութեան, զարմացնում է կենդանի ու զունազեղ երկախօսութիւններով:

Իր վերջին գրւածքը, որ աւարտեց 1912-ին — իր մահւան տարին — եւ որի ուղղումն ու սրբագրութիւնը փոխանակ կնոջ, ինչպէս անում էր առաջ, յանձնեց Նինա աղջկան, Տ7ամեայ Սունդուկեանը նւիրում է հայ աղջկայ փառարանութեան: Ընդհանուր առմամբ, կեանքից ու հետաքրքրութիւնից զուրկ մի գրւածք է, որ առանձին արժէք չի ներկայացնում նրա երկերի մէջ: Կոչւում է «Կտակ»:

Այստեղ խօսք չլիտի լինի Սունդուկեանի հրապարակախօսական գրւածքների, «Մեղու»-ում, «Մշակ»-ում եւ «Արձագանգ»-ում տըպւած նրա «Մասլահատ»-ների կամ «Վարենկի Վեչեր» երգիծական պատմւածքի մասին: Սունդուկեանի ստեղծագործութեան եւ հայ թատրոնի պատմութեան մէջ նրա կատարած դերի բնորոշման համար նրանք անմիջական նշանակութիւն չունեն, թէեւ հետաքրքրական են Սունդուկեանի մաքուր հոգին ու սիրտը, նրա անաղարտ նկարագիրը լմբունելու տեսակէտից:

IV

ՍՈՒՆԴՈՒԿԵԱՆԻ ԱՏԵՂԾԱԳՈՐԾՈՒԹԵԱՆ ԱԿՈՒՆՔՆԵՐԸ

Սունդուկեանի մասին գրողները մէկից աւելի անգամներ աշխատել են պարզել, թէ ո՞ւմ է հետեւել հայ մեծանուն թատերագիրը, ո՞վ է ունեցել նրա վրա առանձնապէս մեծ ազդեցութիւն՝ Մոլիէրն ու եւրոպական թատերական գրականութի՞ւնը, թէ՞ ոուս թատերագիր Օստրովսկին: Նշանաւոր ոուս դերասանուհի Գ. Ֆէդոտովան գրում էր նրան ի պատասխան շնորհաւորութեան. «Սորապէս զգացւած եմ հաճելի ուշադրութիւնից մեծ գրողի, որ յիշեցնում է ինձ մեր ամբողջ Օստրովսկուն»: Ֆէդոտովայի այս կարծիքին համամիտ են գրեթէ ամենքը, ի թիւս որոց եւ իւ. Վեսելովսկին, որ իր գրական ուսումնասիրութիւնների մէջ յաճախ վերադառնում է այս խնդրին: Սակայն, հարցի լուսագոյն պատասխանը տալիս է ինքը Սունդուկեանը նոյն Վեսելովսկիին գրած 1902 թ. նոյեմբ. 19 նամակում: Առաջ ենք բերում այդ նամակը Ե. Շահազիզի թարգմանութեամբ:

« Ես Ձեր հարցումներին պատասխանում եմ բացսիրտ, որ ծնւած եւ կրթւած լինելով Ռուսաստանում, անցած լինելով ոուս գիմնազիո-

նի եւ համալսարանի դասընթացները, լսած լինելով ուսուցչապետներին, նամանաւանդ գրականութեան ուսուցչապետ Նիկիտենկոյին չորս տարի շարունակ Պետերբուրգի համալսարանում, եւ բնականօրէն պիտի դտնէի ուսուստաւոր կեանքի ազդեցութեան ներքոյ: Բայց թէ ո՞ր ուսու հեղինակները ամենից աւելի են ազդել իմ վրա եւ այդ հեղինակներին ո՞ր գրեւծքները յատկապէս տպաւորութիւն են թողել, այժմ եւ դժւարանում եմ որոշել: Ինձ թւում է, որ ես քիչ թէ շատ ամենքին էլ երախտապարտ եմ իմ դարդացման համար, ինչպէս եւ շատ օտարազգի հեղինակներին, որոնց գրեւծքները եւ մանկութիւնից կարդացել եմ Փրանսերէն լեզուով:

« Ամենից աւելի եւս ինձ երախտապարտ եմ համարում նախ իմ մօրս, որ իր բարութեամբ եւ առողջ դատողութեամբ իւր ամբողջ կեանքի ընթացքում ղեկավարել է իմ գործողութիւնները, եւ, երկրորդ, իմ դաստիարակներին – գիտնական Ջրպետեանին եւ նրա կրթեւծ փարիզեցի Փրանսուէի կնոջը, որոնց մօտ եւս մնացել եմ վեց տարի շարունակ, առաւօտեան ժամը ութից մինչեւ երեկոյեան վեցը:

« Մայրս եւ իմ մանկութեան դաստիարակներս արել են այն որ խեղճին, զրկեալին եւ կարօտեալին եւս միշտ վերաբերել եմ կարեկցութեամբ: Ես, օրինակ, երբեք չեմ մոռանայ այն սասանիչ ներդործութիւնը, որ եւս զգացել եմ 40 տարի սրանից առաջ Վիկտոր Հիւգոյի «Իստապարտեալի վերջին օրը»-ի Փրանսերէն բնագիրը կարդալու ժամանակ»:

Սունդուկեանի տւած այս բացատրութիւնը ամենից ճիշտն է: Համոզումները, հասկացողութիւնները, ճաշակները իւրաքանչիւր կրթեւծ մարդու մէջ արդիւնք են նրա իւրացրած մշակոյթի, որ իր հերթին բազկացած է բոլոր այն ապրումներից ու տպաւորութիւններից, որ մարդ ստանում է իր բովանդակ կեանքի ընթացքին. յաճախ փոքրիկ մի բան, պատահական մի տպաւորութիւն, փողոցում տեսած մի դէպք մարդու մէջ թողնում են խորունկ եւ անջնջելի հետք: Միայն նեղմիտ ու սահմանափակ մարդիկ կարող են կուրօրէն հետեւել: Սունդուկեանն իր ժամանակի համար լայնօրէն զարգացած, շատ կարդացած, ուսու եւ եւրոպական գրականութեան մօտից ծանօթ եւ կեանքի խորունկ փորձ ու ծանօթութիւն ունեցող, բիւրեղի պէս մաքուր սրտի տէր մարդ էր: Նա կեանքը առնում էր իր իրական վիճակով, իր երկերի դերակատարներին մօտենում էր ուղղամտութեամբ, սրտով ու համակրանքով եւ մտարկում էր այն ամենը, որ իր անաղարտ հօգուն թւում էր դատապարտելի: Բնական է, որ նման մի մարդ ստեղծա-

զործէր առանց կաշկանդումի, եւ առանց կրկնելու ուրիշի ասածները, գերծ պատրաստի կաղապարներից, ազատ եւ ինքնուրոյն կերպով:

V

ՍՈՒՆԴՈՒԿԵԱՆԻ ԼԵԶՈՒՆ

Սունդուկեանի բոլոր երկերը, թատերական թէ այլ կարգի, գրւած են Թիֆլիսի բարբառով: Միակ բացառութիւն է կազմում «Ամուսիններ» թատերգութիւնը, որ գրւած է գրական լեզուով եւ այդ պատճառով էլ զուրկ է Սունդուկեանի միւս երկերի աշխուժութիւնից եւ գունագեղութիւնից: «Ամուսիններ»-ի լեզուն անկենդան ու ձանձրալի է, զուրկ համից ու հոտից եւ նոյն իսկ, ոմանց պնդումով, գերծ չէ անհարազատութիւններից:

Սունդուկեանի միւս բոլոր երկերը աչքի են դարձում լեզւի կատարելութեամբ: Ամէն քայլափոխին տեսնում է Թիֆլիսի բարբառի կատարեալ տիրապետութիւնը: Սունդուկեանը այդ բարբառն իւրացրել էր իր մօր կաթի հետ. արդէն նրա մայրը ուրիշ լեզուով չէր էլ խօսում նրա հետ: Սունդուկեանի կինն էլ ընդի թիֆլիսցի էր եւ ամուսնու հետ խօսում էր միայն այդ բարբառով, որ հետագային էլ մնաց նրանց ընտանեկան լեզուն: Սունդուկեանը իր լեզւի ճոխութիւնները ստանում էր եւ Թիֆլիսի հասարակ ժողովուրդից, որի շրջանում սիրում էր լինել ու զրուցել եւ որտեղից քաղում էր լեզւական նորանոր հարստութիւններ: Իսկ եթէ ի նկատի առնենք եւ նրա հմտութիւնը գրաբար հայերէնի մէջ եւ լեզւական բնական ընդունակութիւնները, հասկանալի կը լինի նրա լեզւի ու ոճի կատարելութեան գաղանիքը:

Սունդուկեանը երբեք չէր գրում անապարանքով եւ միշտ լաւ մը տածում էր: Եթէ երկախօսութեան մէջ նրան պակասում էր որ եւ է բառ, նա յամառօրէն փնտռում էր եւ գտնում կեանքից կամ փոխ էր առնում գրաբար լեզւի անսպառ գանձարանից՝ յարմարեցնելով փոխառութիւնը Թիֆլիսի բարբառի պահանջներին: Նոյն ձևով վարում էր եւ արաբերէնից, պարսկերէնից ու թուրքերէնից փոխ առնած բառերի հետ. յաճախ ստուգում էր նրանց նշանակութիւնը բառարանների միջոցով եւ առնում էր միայն այն բառերը, որոնք իրապէս համապատասխանում էին իր փնտռած իմաստին: Կաղիմիրսկիի արար – Ֆրանսերէն եւ Կիֆէրի ու Բելինի թուրք Ֆրանսերէն բառարանները նրա սեղանի գրքերն էին:

Սունդուկեանը ո՛չ միայն շատ լաւ գիտէր, այլ եւ ապրում ու

զգում էր Թիֆլիսի բարբառը, այլ պատճառով նրա երկերի գործող անձինք խօսելու ձեռով էլ տարբերում են իրարից՝ համաձայն տարիքի կամ ընկերային վիճակի: Պեպօն, օրինակ, բոլորովին այլ կերպ է արտայայտում, քան Արուսթին Ջիմզիմովը, թէեւ երկուսն էլ խօսում են միեւնոյն բարբառով: Գործող անձերի լեզւի այս տարբերութիւնը առանձնապէս աչքի է զարնում «Սէր եւ Ազատութիւն» գրած֊քի մէջ, ուր ԳՕամեայ Աղաթօն իր խօսելակերպով բոլորովին տարբերում է 40 տարեկան մարդուց, սա էլ՝ 20 տարեկանից:

Թիֆլիսի բարբառի գործածութեան կատարելութեան Սունդուկեանը հասաւ «Ժորժ Դանդէն»-ի թարգմանութեան մէջ: Նա հաւատացնում էր, թէ այդ գրած֊քը հայերէն ուրիշ կերպ կարելի է թարգմանել, բայց եթէ Թիֆլիսի բարբառով, որով միայն կարելի է արտայայտել Մոլիէրի նուրբ սրախօսութիւնները:

Պէտք է աւելացնել, սակայն, որ նոյն այդ Թիֆլիսի բարբառը արգելք եղաւ Սունդուկեանի երկերի լայն տարածման: Թիֆլիսից դուրս դժար էր գտնել դերասաններ, որոնք կարողանային բնագրի լեզւով խոսող նրա թատերախաղերը, իսկ թարգմանութիւնը, ի հարկէ, վնասում էր երկի հարազատութեան:

Իրիւ բացառութիւն, պէտք է յիշել «Օսկան Պետրովիչը էն կինքում» գաւեշտի վերածումը պոլսահայ բարբառի, որ կատարել է դերասան Փասուլեանեանը՝ «Տայը հիրիկ անդէնը» անունով: Գործը կարելի է համարել իրապէս յաջող:

VI

ՍՈՒՆԴՈՒԿԵԱՆԸ ՎՐԱՅ ՄՕՏ

Սունդուկեանը սնեց ու դաստիարակեց այն ժամանակ, երբ կովկասեան, այսինքն՝ հայ ու վրացի մտաւորականութիւնը նոր նոր ծնունդ էր առնում, իսկ թուրք մտաւորականութիւնը դեռ բնաւ դոյուլթիւն չունէր: Հայ մտաւորականութիւնը վրացականի համեմատութեամբ բաւական հին էր, չնորհիւ Լազարեան ձեմարանի, որի ընթացաւարտները ազատ մուտք ունէին ռուսական համալսարաններ: Երբ Թիֆլիսում բացւեց գիմնազիա, նրա աշակերտներից յաջող աւարտածները պետական թոշակ էին ստանում՝ իրենց ուսումը համալսարանում շարունակելու համար:

Հայ ու վրացի համալսարանականները կովկաս վերադառնալուց յետոյ ապրում էին համերաշխ: Նրանց միացնում էր ոչ միայն գրպորոցը, այլ եւ մտաւորականի վիճակը հասարակութեան մէջ, ուր ո՛չ

միայն բարձրագոյն, միջնակարգ կրթութիւն էլ հաղապարհ էր: Մասնաւորապէս Սունդուկեանը, որ հաւասարապէս լաւ տիրապետում էր թէ՛ հայերէն եւ թէ՛ վրացերէն լեզուներին ու գրականութեան, վրացիները չըջանում էլ մտերիմ մարդ էր, որ հասկանում ու գնահատում էր երկու ժողովուրդների կենսական պահանջները: Մանաւանդ որ, այն ժամանակ դեռ հայերի ու վրացիների ազգային քաղաքականութիւնը հակառակ չէր եւ ուղղած էր միայն կառավարութեան ուսացման ձգտումների եւ թիւրքերի ու պարսիկների դէմ, որոնց ճշմունքները դեռ թարմ էին բոլորի յիշողութեան մէջ:

Յամենայն դէպս, Սունդուկեանն ինքը միշտ սիրով ու բարեկամարար էր տրամադրւած դէպի վրացիները, որոնք, իրենց հերթին, յարգանքով ու սիրով էին վերաբերում նրան: «Մշակ» թերթում (1910 թ. թիւ 96) հրատարակւած իր մի նամակի մէջ, «Պեպո»-յի բեմադրութեան երեսնամեակի առթիւ, Սունդուկեանը գրում էր. «Աշխատելով երկու հայրենակից, ինձ մեծապէս սիրելի վրացի եւ հայ բեմերի համար, պատկերացնելով ընդհանուր մարդկային դպացմունքներ եւ գաղափարներ, ես չափազանց դպացւած եմ ինձ ուղղւած խօսքերով ու ճառերով, ստացւած շնորհաւորական նամակներով, հեռագրներով եւ ուղերձներով»:

Սունդուկեանի դերն ու նշանակութիւնը վրաց թատրոնի պատմութեան մէջ շատ լաւ արտայայտւած է վրաց վաստակաւոր թատրոնական գործիչ Կ. Ղիպիանիի մէկ ուղերձի մէջ, որ 1901 թ. ապրիլ 27-ին ներկայացւեց վրաց թատերախմբի կողմից: Ուղերձը կարդացւեց վրացերէն լեզուով Ղիպիանիի կողմից, «Պեպո»-յի վրացերէն ներկայացումից յետոյ: Ղիպիանին յիշելով, որ վրաց թատրոնը սկսւել է իշխ. Գ. Էրիստովի եւ հայագրի Զուրար Անտոնովի ջանքերով, որոնցից յետոյ 25 տարի դադար է առել, շարունակում է. «Հանդէս էք գալիս դուք, եւ վրաց թատրոնի համար վրա են հասնում ուրիշ ժամանակներ, նոր կեանք է սկսւում սթափւելով 25ամեայ մահաքընից - երեւան է գալիս վերածնունդը»: Ապա Ղիպիանին խօսում է Սունդուկեանի տիպերի ընդհանրութեան մասին հայերի եւ վրացիների մօտ, գովաբանում է Սունդուկեանին իբրեւ ողբգէտի, ժողովրդի հոգու խորքերը թափանցողի, ջատագովում է հայ դերասաններին, որոնք արտայայտել են Սունդուկեանի տիպերը: Եւ շարունակում է. «Ոչ բոլոր մահկանացուներին է միժակւած լինում օժտւած լինելու այդպիսի ընդունակութիւններով, այդ պատճառով եւ մենք առաջ ենք քաշում ձեզ մեր միջից, իբրեւ բարձր տաղանդի տէր մի միակոր»: Իր ուղերձը Ղիպիանին վերջացնում է այսպէս. «Ես, որ-

պէս վրաց թատրոնի գործիչներէից ամենահինը, է՛լ աւելի բերկրանքով ողջունում եմ ձեզ այսօրւայ հանդիսին, որովհետեւ մենք, մայրենի թատրոնի գործիչներս, սնուել ու մեծացել ենք ձեր պիէսներով. մենք ուսել ենք արւեստը ձեր պիէսների վրա, մենք ոգեւորւել ենք ձեր երկերով եւ այսպիսով ձեր աշակերտները լինելով՝ հրճանքով շնորհաւորում ենք ձեր այսօրւայ յորելեանը, քանի որ ոչ ամենքիս է վիճակած հետագայ սերնդի այդպիսի երախտագիտութիւնը, ինչպէս ձեզ» :

547-2001

Ղիպիանիի խօսքերը յորելեանական չափազանցութիւններ չէին: Եթէ վրացիները այդպիսի հանդիսաւորութեամբ ասնեցին Սունդուկեանի յորելեանը 1901 թւին, երբ հայ - վրացական յարաբերութիւնները սրած էին տարապայմանօրէն, նշանակում է, թէ այլ կերպ վարւել կարելի չէր, թէ Ղիպիանիի խօսքերի մէջ չափազանցութիւն չկար: Եւ, յիրաւի, վրաց գրականութեան պատմութեան ի՛նչ գիրք ուղում էք առէք, ամէն տեղ կը գտնէք Անտոնովի եւ Սունդուկեանի անունը: Ծիշտ է, յաճախ այն էլ է ասում, թէ դրանք «վրացացած հայեր» են, բայց անունները առանց յիշատակութեան չեն թողնում:

«Վրացացած հայ» խօսքի առթիւ չեմ կարող չյիշել Գէորգ Չմբլկեանի զանգատը իր յուշերում («Փորձ», 1877), թէ վրացիները «Պեպո»-յի ներկայացման ժամանակ Պեպոյի դէմքին տալիս էին վրացական ձեւ, կարծես ուղելով ընդգծել, թէ դրական տիպը պէտք է լինի վրացի, իսկ բացասականը՝ հայ:

Երբ Սունդուկեանը մեռաւ, վրաց հասարակութիւնն ու մամուլը հայերի հետ համահաւասար վշտով ողբաց նրա մահը: Առաջ բերեմ վրաց բանաստեղծ Գրիշաչվիլիի խօսքերը. Սայեաթ Նովային նւիրած իր ուսումնասիրութեան մէջ՝ նա շատ ջերմ կերպով արտայայտում է Սունդուկեանի մասին: Մատնանշելով Սունդուկեանի տաղանդի ինքնուրոյնութիւնը՝ նա հրճում է Սունդուկեանի «Իմ մահը ե թաղումը» գրւածքի մէջ արտայայտած հոգեկան գեղեցկութեամբ: Եւ վերջացնում է. «Մեռաւ Սունդուկեանը եւ աղօտացաւ այն հայելին, որի մէջ այնպէս գեղեցիկ կերպով արտացոլում էր Վրաստանի մայրաքաղաք Թիֆլիսը»:

VII

ՍՈՒՆԴՈՒԿԵԱՆԻ ՆՆՐՔԻՆ ԿԵԱՆՔԸ

Իր ստեղծագործական տարիների ընթացքում Սունդուկեանի կեանքը արտաքննապէս ըստ ամենայնի չափւած ու ձեււած էր: Ցերե-

կը՝ պաշտօն, ժամը 3-ին ճաշ, ապա կարճ հանգիստ ու գրօսանք, իսկ երեկոյեան աշխատանք գրասեղանի մօտ, որ երբեմն ընդհատուում էր հիւրերի այցելութեամբ եւ բարեկամական զրոյցով թէյի սեղանի շուրջ:

Սունդուկեանի կեանքի մէջ տեղի են ունեցել մի շարք դէպքեր, որոնք որոշ տպաւորութիւն են թողել նրա հզեկան վիճակի վրա: Նախ՝ մօր մահը 1873 թ., որ նա ապրեց շատ ցաւազին կերպով:

Մանուկ օրերից Սունդուկեանը երազում էր դէթ մի անգամ ընկնել Փարիզ, որը նա սիրում էր եւ ճանաչում իր առաջին դաստիարակչուհի Տիկ. Զրպետի պատմութիւններից ու Փրանսական գրականութիւնից: Երբ եկաւ այդ երազը իրականացնելու ժամանակը, Սունդուկեանը նախ Փրանսերէն թարգմանեց «Պեպօ»-ն, հոգու խորքում փայտաշելով իր երկը Փրանսական բեմի վրա տեսնելու յոյսը: Թարգմանութիւնը խմբագրեց Թիֆլիսի Փրանսական հիւպատոսը, որ նաեւ տւեց յանձնարարական նամակ յայտնի թատերագիր Վ. Մարգուլի վրա: Սունդուկեանի գրածքը կարգաց ինքը Սարգուն, ինչպէս նաեւ յայտնի գրագէտ Ալ. Դիւմա որդին: Դիւման մի շատ սիրալիւր նամակ գրեց Սունդուկեանին, բայց խորհուրդ չտւեց ներկայացնել՝ առարկելով, թէ «Պեպօ»-ն չի համապատասխանում Փրանսական հասարակութեան ճաշակին եւ յաջողութիւն չի ունենայ: Նամակը ծանր հիասթափում պատճառեց Սունդուկեանին:

Առաջին օրերը Սունդուկեանը պատանիի պէս յափշտակուում էր Փարիզով, հակառակ որ արդէն վաթսուն տարեկանի մօտ էր: Նա բարձրացաւ Վանդոմի կոթողը եւ Յաղթական կամարը: Անհաշիւ ծանօթութիւններ հաստատեց: Լինում էր ամէն տեղ: Բայց հազիւ երկու շաբաթ անցած, սկսեց քաշել Թիֆլիսի կարօտը: 1878 թ. յուլիս 21/9-ին նա գրում էր կնոջ՝ նամակին ընարան առնելով Սայեաթ Նովայի ծանօթ խօսքերը՝ «Առանց քիզ ինչ կոնիմ սոյբաթն ու սաղըն.— «Առանց քիզ ի՞նչ կոնիմ Փարիզը, Սոնա ջան, իմ քաղցը, իմ նազ Սոնա ջան: Քո ձէնը, երեխանց ձէնը որ չեմ լսում, ձեզ որ չեմ տեսնում, դիմի քնթէ գուս է գալի... Մարդու աճկը վտնչինչը չի կշտացնի. քանի էտի էի, հա՛յ Փարիզ ու Փարիզ, հիմի վուր էստի իմ, հա՛յ իմ Թիֆլիս ու Թիֆլիս»...

1855-ին Թիֆլիս է այցելում յայտնի ուսու թատերագիր Ա. Օստրովսկին, եւ Թիֆլիսի թատրոնում նրան հանդիսաւոր ընդունելութիւն է սարքւում: Սունդուկեանը ծանօթանում է Օստրովսկիի հետ, որը ներկայ էր գտնւել նրա թատերախաղերի ներկայացումին: Օստրովսկին ծանօթանում է եւ «Պեպօ»-յի ուսներէն թարգմա-

նութեան, շատ դո՛ւ է մնում եւ տանում է հետը Մոսկւա՝ կամենալով ներկայացնել Փոքր Թատրոնի բեմի վրա: Բայց ճակատագիրը այստեղ էլ դէժ մ է դուրս գալիս Սունդուկեանին: Մոսկւա հասնելով՝ Օստրովսկին շատ ծանր հիւանդացաւ եւ 1866 թ. մեռաւ, ուսերէն «Պեպո»-ն էլ մնաց չներկայացած:

1888 թ. հայոց եւ վրաց Թատրոնները տօնեցին Սունդուկեանի Թատերական դործունէութեան 25ամեակը: Հանդէսը դուրս եկաւ շատ սրտազին: Երկու ժողովրդի մտաւորականները ջերմ մասնակցութիւն ունեցան տօնակատարութեան: Իսկ 1901-ին, նոյնպիսի հանդիսաւորութեամբ, տօնեց «Պեպո»-յի բեմադրութեան 30ամեակը:

1890 - 1898 տարիների ընթացքում Սունդուկեանն ունեցաւ մի մեծ հիասթափութիւն եւս. ինչպէս վերեւն ասացինք, 1890-ին նա հրապարակ էր հանել «Ամուսիններ»-ը, դրական լեզուով: Այս խաղն էլ ուզում էր ներկայացւած տեսնել ուսական բեմի վրա: Թարգմանելով ուսերէն՝ նա դրւածքը ներկայացրեց զրաքննիչին՝ ներկայացման արտօնութիւն ստանալու համար: Գրաքննական կոմիտէն, սակայն, մերժեց արտօնութիւն տալ, այն առարկութեամբ, որ Թատերգութեան մէջ աննպաստ դոյներով ներկայացւած է բարձրաստիճան մի պաշտօնեայ: Կոմիտէի վրա վատ էր ազդել այն հանդամանքը, որ Սունդուկեանը ինքն էլ բարձրաստիճան պաշտօնեայ էր: Գործը ձգձգւեց ամբողջ 8 տարի եւ միայն մի շարք ուղղումներից յետոյ արտօնութիւն տրւեց 1898 թւին: Ռուսերէնի մէջ մտցւած ուղղումները Սունդուկեանը չմտցրեց հայերէն բնագրի մէջ:

1892 թ., տեղի ունեցան կաթողիկոսական ընտրութիւններ: Թիֆլիսի Թեմի պատգամաւորների շարքում ընտրւեց եւ Սունդուկեանը, իրրեւ մշակական կուսակցութեան թեկնածու, բայց ընտրութեան ժամանակ քէ տւեց «Մշակ»-ի հակառակորդ թեկնածուին. Գր. Արծրունին խորապէս վրդովւեց եւ իր թերթում յարձակեց Սունդուկեանի վրա: Վերջինս պատասխանեց, թէ ինքը երախտապարտ է «Մշակ»-ին, եթէ իր ընտրութիւնը նրա կամքով է եղել, բայց որ եւ է յանձնառութիւն չի ստացել եւ քէ տւել է համաձայն իր հասկացողութեան ու ապառ խղճով եւ իր վարմունքը համարում է ճիշտ ու շիտակ: Այս բախումը «Մշակ»-ի հետ շատ վշտացրեց Սունդուկեանին, եւ հաշտութիւնը տեղի ունեցաւ միայն 1900-ին: Դրանից յետոյ, Սունդուկեանը «Մշակ»-ում տպեց չորս «մասլահաթ», որոնցից վերջինը իր մահւան տարին:

Ութսունական թւականներին Սունդուկեանը ինչ որ բարեկամութիւն է հաստատում Ալ. Լեպեշչինսկայա անուանով մի կնոջ հետ, որի

հետ նամակագրութիւն էր պահում եւ նամակներով հայերէն դրաբառի դասեր էր տալիս: Լեպեշչինսկայան խանդավառ նամակներ էր գրում: Նամակներից երեւում է, որ Սունդուկեանին նա բնաւ չէր տեսել: Ի՞նչ էր սա՝ սիրային զբացում միայն կնոջ կողմից, թէ՞ Սունդուկեանն էլ էր պատասխանում՝ ոչինչ յայտնի չէ:

Իր կեանքի վերջին մէկուկէս տարիներին Սունդուկեանի առողջութիւնը բոլորովին խախտած էր. նա տառապում էր զառամութեան ախտով, բայց պահել էր մտքի յտակութիւնը: Հակառակ հիւանդութեան, նա, շարունակում էր աշխատել եւ գրեց իր վերջին գործը՝ «Կտակ», որ նրան յարգող ղերասանները պատրաստում էին ներկայացնելու՝ գիտենալով, որ Սունդուկեանը շատ է ուզում տեսնել իր նոր գրածքի բեմագրութիւնը:

Մահւանից մի տարի առաջ, 1911-ին, Սունդուկեանը ամառն անցկացրեց Բորժոմում, ուր գրեց իր վերջին գիմումը ընտանիքին եւ հայ հասարակութեան՝ «Իմ մահն եւ քաղումը»: Այդ գրածքը այնքա՛ն անկեղծ է, այնքա՛ն սրտառուչ, որ անկարելի է առաջ չբերել ամբողջութեամբ, իբրեւ վերջարան այս յօդւածի:

Սունդուկեանը աշխատում էր մինչեւ կեանքի վերջին վայրկեանը: Մահւան օրւայ առաւօտը, 1911 թ., մարտ 16-ին, նա յանձնեց իր երէց աղջկան «Կտակ»-ի ձեռագրի ուղղումները, որ կատարել էր մի օր առաջ:

Նրա գրասեղանի վրա, թղթերի մէջ, դտնեց մի թերթ, որի վրա գրւած էին հետեւեալ կէտերը.

15 մարտի 1912 թ. Ա՛յ, էլի քանի բան ունիմ.

- 1) «Կտակ»-ը տեսնել բեմի վրա.
- 2) «Կտակ»-ը տպիլ.
- 3) Տպիլ Հադիդի մասլահաթները.
- 4) Տպիլ Վարինկի վէջերը.
- 5) Զրպետեանի ու նրա կնգայ պատկերնիրը ճարել. Մադամ Դելֆին Դորբոսնսկու հանգու. ձեռին էր Տվերում.
- 6) Իմ կինքը գրել. էս դադա կինք ինձ ո՞վ կուտայ. Աստուծ խօմենակ ինձ համար չի պարպի:

Գ. Ս.

Կարելի՞ է երեւակայել աւելի յուզիչ բան, քան այսպիսի արժանաւոր ծերութիւնը, որ եսականութեան սուտերն իսկ չունի իր մէջ:

ԿՏԱԿ

Իմ մահն եւ քաղուսը

Մնա՛ք բարով, յիս գնացի էն հանգի տիղ, վուրդանց, ինչ աշխարքը ստեղծվիլ է, ջեր ոչով չէ հիդ եկի:

Դուք լա՛ւ ըլիք, երգար օր ունենաք, ջանով առողջ ըլիք, սրտով ուրախ, հոքով հանգիստ:

Ինչ գէթ իմ արի օմքնու, խնդրում իմ բախչէ, ով ինձ է գէթ արի ու դաղիլէ սիրտս, իս էլ բախչում իմ իստակ սրտով. խճայտանքը վունչիչ զնամիչ չանէ իրան իր օրումը: Ինձ թաղելիս վունչիչ թանթանէք հարկավուր չէ: Տան կարք ու սարքին ձեռը չտաք, զարթնի իմ բանելու ու քնելու օթախին, վուր դի իմ յաւիտենական քնելու գողենքը պիտի պատրաստիք: Մնացած օթախները էնէնց մնայ, վունցոր կայ, ինչրի ինձ կու թաղին, իժում դուք գիդիք:

Սիվիբ վունց մէ օթախումը չըլի ու դուք էլ, իմ աղիղ Սօֆի ջան ու սրտով սիրած վուրթիքս ու թուռնիրս (Chère Hélène), վուր իսկի էլ սիվիբ չհաքնիք, խիստ լաւ կօ՛նիք: (Ամա խելքս իսկի չէ կտրում, թէ դաբոււ անիք): Վէնօկնիր մէ հատ էլ չըլի, վունց տանը, վունց դուսը, վունց դուք շինել տաք, վունց ուրիշիմէն ընթուռնիք. վաղօրօք էղէտ հայտնեցէք, վուր ոչով չնեղանա:

Կուրօ դրէք ինձ իմ սիվ սերթուկով ու մորթէ իմ սիպտա գղա-կով. իմ թաղումի առաջ տանը վունչիչ պանիխիդիք չըլի. մենակ իմ տանու քաղանէն հերիք է, վուր եկողներու համա մէ «Հայր մեր» ա-սէ, վունցոր վաղ կարք էր: Ու թէ հիռավուրներն ու յաղիրը իսկի էլ չնիղանան, չգան ու ամէն սահաթի, մէկ միկու իղնեն, կնդաս ու վուրթկերանցս նուրմէկանց չլացցնին, աւելի լաւ կօնին: Նրանցմէն ով ուզում է իր սրտի ցաւը յայտնի իմ դիյիբ թող իր այցետոմսը տա դռներումը կամ թէ չէ, էնդի էվէտ դաւթրումը գրէ իր անումը, վունցոր լուսաւոր յերգիրներումը ընթուռնած է:

Մոռացայ իր տիղն ասիմ վուր դաղէթնիրը չըքցնիք անթիւ ու անճոռնի յայտարարութիւններով ու անտեղի խօսկերով: Ով չի դի-դի, որ դիփունիդ համա, ով ինձ սիրում էր, յիս էսէնց սիրեկան ու թանգադին իմ էլի. համ էլ էտ խօսկիրը շատերը, մէկ մէկու մտիկ տալով, մինձ ու դառը, խիստ դառը կսկիծով ին յայտնում:

Մախլաս:

Իմ մահան յայտարարութիւնը գրեցէք, առանց չինո յայտնելու, էսէնց՝

Գաբրիէլ Սունդուկեան Համմալ վախճանեց (Ժամանակը) հու-

ղարկաւորութիւնը տեղի կունենայ (օրը) առաւոտեան (ժամը) հանգուցեալի բնակարանից, եւ այլն :

Ինձ թաղելու օրը մէ քահանայ ըլի մենակ — իմ տանու քահանէն — իմ առչիւր քնացող ու մէ էլ միկ տիրացու, նրան ծառայող : Ուրիշ քահանաներու, ուրիշ հոբելուրտկաններու ոչովի չխնդրիք ու չնիղացնիք (ամա ումը պիտի կանչել էյիք ու իմ ասելով չիք կանչի, իրանց ախր թամամ վջարեցէք, վուր ինձ համա չասին թէ՛ ինչ սկուպօյի մարթ է էլի) : Ծառայութենի խաչիր ու նշաննիր վունց բալչնիրով, վունց առանց բալչի իսկի չըլի :

Իմ առչիւր գնացող քահանէն ու տիրացուն սուս ու փուս գնան իրանց ճամփէն տանեմէն ինչրի եգեղեցին ու էնղանց ինչրի գերեզմանս . ճամփին վունչիչ շարական ու բարձրաձայն աղօթիկներ չըլի :

Թանգազին Սօֆի ջան ու թանգազին զաւակներս . դուք համա . շա խելօք իք էլի . դուք դիդիք, վունցոր սրտեներուդ կու զայիմ . ացնիք ինձ ճամփայ գցելիս :

Ամփոլանու ուրիշ ցերեմօնիք իսկի չըլի . իլտիմ թէ ձիաներու գլխին են բմբլէ թայգուլնիրը սարքած, վու ինձ ճիճիի է բերում . ութ համալ ու ութ կինտօ մեճրեցէք . հիրթով ճտի պէս կու թոցնին ինձ . կուլի նրանց մէչը դուրթ Պէպօ էլ ոստս դա . էտ խիստ մինձ պատիւ կուլի իմ Պէպօյի համա : (Իրանց ջափահախը, ինչ հարկաւոր է, աւելի տէք ու պակաս չէ . նրանք շատ չին ուզի) : Վի՛րչը թաղեցէք ինձ, վուրդի էլ գո՛ւղիք : Յիս գուղէյի իմ մօր մօղ, ամա տիղ չկայ . նրա մօտ թաղած երեխերքս թարժած չըլին : Գերեզմնիս վրայ վունչիչ արձան հարկաւոր չէ . մէ սիւքար ու իմ ջանը : Վրէն գրիւ տէք էսէնց՝

Գարրիէլ Սունդուկեան — Համմալ

Ծնւեց 1825, յունիսի 29-ին

Վախճանեց 191 . թ . . . —ին

Թէ սրտով վրէս արձան իք ուզում ու արժանի կու համարիք, էտ արձանը, իմ փուխանակ, Պէպօյի համա կանգրեցէք, վուրդի որ կու սաղ գայ :

Սաղ բոյով կանգնած ըլի բացը պատվանդանի վրա իր հաքուստով, գդակը ծածկած, մէ ձեռին Արութինի բարաթը, մէկէլ ձեռքով վրէն գրածն ըլի ցույց տալի նրան, վուր գլխաբաց ու սերթուկով սիւերես կանգնած է կշտին : Տակս, պատվանդանի վրայ գրած ըլի մենակ էս խօսկերը՝

Պէպօ՝ «էս քու կոտրած ձեռով չի՞ս գրի՛ . . .»

էն արձանն ու պատվանդանը թուջեմէն ըլի ածած ու շինած . վրէն վունց մի տեղ իմ անումը չյիշիք :

Իմ ցանկութիւնը էն է մենակ , վուր դիւտունի սրտումն ու մըտ-կումը հիգնուհիւրը աւելի ու աւելի հաստատուի էն հասկացողութիւ-նը (ու գլխով հաստուի էն միտկը) թէ հաշա ուտիլը մինձ ամութ բան է մարթու համա ու ով իր պարտկը չի ճանչնա , տւած խօսկը չի կա-տարի , իր ձեռք քաշած թուխտը կու ուրանայ , նա մարթ չէ , ինչքան գուղէ բացը ըլի կանգնած մարթկերանց մէջ :

Գանք հիմի ասածներուս կատարելու վրա :

Պէտքոյի արձանը շատ հեռու բան է . էստու համա ոչով չնեղանաք հիմի ու անմիղ ժամանակ չկորցնիք :

Իմ թաղումին ինչ փուղ պէտք գա իմ պարտկն է , էստու դահրը գնիկս ու վուրթիքս կու քաշին էն պստիկ կարողութենեմէս , վուր թողնում իմ նրանց համա :

Քելելիս – մեկելիս իսկի հարկաւուր չէ . էն օրւան ախկըտներու ճա-շի փուղը իմ տանեմէն կու տաք Հայոց Բարեգործական Ընկերութե-նին նրանց բաժնելու :

Մնաց իմ թաղումի կարք ու սարքի կատարելը . վունցոր գրիլ իմ էստի վերիւր : Սրա համա յատուկ խնդրում իմ «Մշակ» լրագրի յարգելի իմբագրութենին , իմ սրտակից բարեկամներուս , աչկիս լուս կնդաս ու վուրթկերանցս աշխտին ճշտութենով գլուխ բերեն ասածս ու խնդրածս :

Մնա՛ք բարով :

Մնա՛ս բարով , թանգագին իմ Սօֆի ջան :

Մնա՛ք բարով թանգագին զաւակներս :

Մնա՛ք բարով սիրելի բարեկամներս :

Մնա՛ք բարով սիրելի մարթիք , ինչ ասկի , ցիղի ու հաւտի էլ ըլիք :

Մնա՛ս բարով , իմ սիրած Թիֆլիս քաղաք :

Մնա՛ս բարով սիրելի ու պաշտելի ասկ . Աստուճ վաթանիդ ար-ժանի անէ :

Դիւտունիդ սերը սրտումս խուրը թաղած տանում իմ հիդս :

Մնա՛ք բարով :

Գաբրիէլ Սունդուկեան – Համմալ .